



莽古原人史

荒古原人史目錄

第一章 緒言

第二章 最古之人迹

第三章 舊石器前期

第四章 舊石器後期

第五章 新石器通論及前期

第六章 新石器特跡及後期

第七章 金器時代

荒古原人史

英國 麥開柏著 中國 吳敬恆譯

第一章 緒言

每一學術之立。必經甚多創作之人。各自標立其名詞。至于無可別擇。研究史前人類之學。所定名詞。亦已甚多。用之最普通者。合希臘兩文而爲之。名之曰古世學。然人皆旋訾爲不適當。德法之學者稱爲上古史。亦未鑒于人意。惟近有名之爲史前古物學。或曰史前人類學者。似乎較切當矣。但古物學之名。僅限于人工所造之品物。尤不若人類學之足以兼賅。因此學之界說。乃在文字記載以前。搜求一切之遺跡。凡關於人類者。皆在所研究。故括以人類之統名。似所包者廣。雖人類學之名詞。實合人種學。人種比較學。動物學。生理學。解剖學。心理學。神學。史

學等。關連結構。今之史前人類學。包含無此廣大。則彼取廣義。此取狹義可矣。吾之此書。但刺取此學之要義。使學者略知歷史以前人類之狀況。故別稱之爲荒古原人史。無足以言學也。

史前人類學之名詞。雖爭執頗多。然猶不若承認其證據之爭爲愈烈。當去春達爾文氏百歲紀念會開會之際。共憶五十年前。始有人覺知人類過去之踪跡。若僅局于史家之記載而求之。則天地似已過隘。于是乃紛求遺跡于地中。其品物既積。而論爭亦劇。今欲略述五六十一年內之爭點。當先臚叙從前之舊事。以清其源流。當一千九百六十年以前。在中國西漢之季。有羅馬詩人羅克利孝斯者。彼之詩歌中。頗多天演之概念。彼以爲人類乃由野蠻之狀況。漸進于文明。于使用金類器物之先。必有一時期。止用石器。尤可異者。彼更有一幸中之推測。以爲用鐵之先。僅能用銅。然當時之人。深信人類之初生。乃爲黃金世界。羅氏之詩意。直

至十九世紀。亘二千年。無一人過問。蓋黃金世界爲人類起原之說。不惟希臘羅馬之文學。竭力鼓吹。卽求諸印度波斯及巴比倫之教典。甚至從前日耳曼野人及美洲紅印度人之神話。莫不如此。合全世界而求之。止有伊大利與中國略有流傳之古語。稍述野蠻之真相。不知彼中何忽有此。

譯者按。所謂中國古語。稍述野蠻真相。大約卽謂茹毛飲血之類。然所謂九皇之制。主不虛王。臣不虛貴。又謂不擾匹夫匹婦之爲皇。故黃金棄于山。珠玉捐于淵。種種古勝于今之觀念。不思毒蛇猛獸蔓草惡木之可怖。反以爲竹簟涼牀。羲皇可夢者。抱此高曠思想之人。固所在皆是。誰謂黃金世界。獨不在中國之古世歟。

至於中古時代之末葉。惟有一離奇之討論。雖不足引述。然亦可爲思想之稍有生動。蓋因舊約創世記之中。有一支離之故實。謂亞當之前。曾有一被棄于天之

人類時人據之以討論。遂生紛殊之異說。有謂斐洲之黑人。當卽爲棄人之子孫。不應盡享人權。諸如此類。誕妄可笑。然此等無徵之詞。漸皆不以爲有味。稍一波動。而風潮卽過。

于是直至十八世紀之末。天演之學理。漸以萌芽。達爾文氏之祖父。及法國之陸謨克。又與時論爲激戰。然當時之助力過小。未能稍撼多數之偏見。惟發見石器時代之證據甚多。頗致時人之驚疑。

以上兩動機。卽爲羅克利。孝斯氏以來。所僅而墳起之伏脈。于陸氏等石器之證據。能突加擴充。則在十九世紀之上半。其時全世界皆有所發見。日增月益。幾于俯拾卽是。于是皆驚嘆于取證之不遠如此。胡以舊謬之流傳。能相持如許之久。石器之有資于證古寶之者。漸多。石鏃石斧。搜羅日廣。然膠執偏見之人。仍可諄諄而有詞。在于吾英。可卽指爲近古白利登人之遺器。原不在書契以前。否則可

歸之于洪水以前之棄人。或并歸之于異人。蓋向日行路之人。十口相傳。往往在荒煙蔓草之境。突遇神怪。能以石箭中人。在蘇格蘭新石器時代之地層中。發見石斧。時人則辨爲此種石斧。名爲滌罪之槌。爲死人之殉葬物。用以撼闢地獄之門。故羅馬教王所立之古物陳列院。其間貯藏已三百年者。甚多舊石器時代之遺器。一皆歸之于靈怪之迹。嗚呼。偏見之足以蔽明。竟至于此。

故在一千八百二三十年間。石器之出地者雖多。而當時地質學尙未成立。未能得精嚴之界說。以折悠謬之口。迨地質學之條理釐然分明。而後以發見書契以前之古物。見告者亦秩然而有序。皆以爲人類過半之陳迹。不能但求于歷史。而必廣搜于地層。在法蘭西比利時丹麥三國。遂有多數之學者。專心研究于此事。其時吾英則無其人。僅前于此而在一千七百九十七年。有佛利爾。在霍格森搜獲石器。斷言此必用之于極古之人類。其人當在用金以前。自專心搜求者既多。

由一千八百二十七年迄于本紀之半。搜獲之物甚爲繁富。于一千八百三十六年時。丹麥湯謨生氏始確布石器銅器鐵器諸時代之分別。證之于丹麥一無可搖。在此二十年中。復于已滅絕之獸類地層中。得有人骨若干。于是發掘洞穴。益加熱狂。乃提議于科學界。欲別立人類化石之科。不幸而有名之地質學家。類如昔日法人瞿惠業之徒者。皆無端傾向于舊說。則當時由狂熱而得之遺物。忽不爲時人所重。甚至于極可寶貴之物品。竟遭散失。

此又爲此學初開幕時一段之失敗歷史。洎乎十九紀下半之初年。所謂最近五十年之爭點。初起而此學亦以確立。爭點之起。中心則在法蘭西。有浦台斯氏者。一退休之醫官。曾于法國北境松末谷。搜集地中古器者數年。此谷經地質學家所考定。指爲經洪水泛溢。存積古物甚多之處也。浦氏集器之先。固未有意于搜考洪水以前之人迹。故于一千八百四十七年敘述其所得之品物。刻有一書。

僅曰洪水以前之古物而已。然因挾此偏見之人。並不認之爲古物。遂激使浦氏發憤。益加搜掘。旋于松末谷相近之亞貝維爾城。得有石器。乃斷爲不惟爲洪水以前之古物。而用此器之人種。實遠在洪水前無量數之年代。其爭端不息者。近十年。迄于一千八百五十九年。經多數學者之維持。浦氏卒獲勝利。英國有名地質學家丕斯瑞與倭凡斯二氏。亦殫竭心力。助重證于浦氏。

在浦氏與偏見者力爭之際。一千八百五十六年。德國亦有重要之發見。蘭因河上之甯圖谷。因穿鑿礦穴。工人得有異狀之人骨。學者爭相檢驗。藏之于就近一大市名提賽篤巫者之博物院中。今已普通承認此等人骨。當屬於舊石器時代之前半期。當彼等生存之時。歐洲之人迹已多。就其頭蓋而論。多數之地質學家。皆謂其人之程度。應居今日最野蠻人類之下。

至一千八百六十三年。英國大地質學家李雅爾搜集羣證。著有地質學上之人

類古物考。同年赫胥黎廣天演于人類。亦著一有名之書。名曰人類天然之狀況。皆預畫一合理之例格。迎受後來之新發明。加以達爾文之種源。已先二書而出版。世界之思想。本已爲之一變。而于是舊日黃金世界之偏見。漸漸銷滅。

方一千八百五十四年時。開魯氏曾在瑞士之湖中。發見新石器時代人植木而居之舊迹。初未有人注意。法國濮臯氏之人學會。在一千八百五十九年建設于巴黎。後六年。穆提來氏又有萬國人類學及史前古物學會之組織。開會者兩年。于一千八百六十七年。始將開魯氏植木之迹。競相討論于會中。討論未已。又一新奇之問題。突然出現。蓋一日會中忽來一人。乃法國教士蒲下叙。言彼于巴黎西南之屯內城。發見石器于第三紀之地層中。第三紀爲地質學上絕遠之時代。如何忽有此人造之石器。全會皆爲之譁然。雖當時之會員。不能所駁難。多數承認爲人造之物。然近今之科學家。皆未許爲第三紀之人迹。因舊石器時代之人

類。今已鑿然證明。至于第三紀之果否有人。尙在討論之間也。

自一千八百七十年以來。講求其事者。日以益繁。凡盡地質學家及人類學家。莫不置此問題于首要。由是此學愈有成家之勢。久之竟變爲專科。專治此事之學者。與夫專論此學之書報。遍于文明各國。惟德國則發達稍遲。因有人類學會之會長孚久氏者。彼欲自爭其位置。對于天演學理。持其無理解之偏見。出而阻遏。國人遂爲之傍徨。英吉利法蘭西瑞典那威丹麥。嚮導得其人。而又著作繁富。故此學之興盛。足以稱最。然比利時伊大利瑞士。亦不落後。西班牙與澳大利。近年亦有顯著之發明。南北兩美洲則著作家與搜求家。皆能擴充範圍。廣羅證據于世界。雖此學進步之故實。不勝縷書。然卒業吾書。則各國學者之如何競進。千百家之著作如何發凡。皆足以得其梗概矣。

積半世紀之搜求。而史前人類之生活。始足以供吾人敘述其概要。縱使人類之

遺骸得之未備。然人類之發展。由絕下之程度。以漸而至於文明。其證據已極豐足。蓋最粗削鑿之石器。僅可辨爲造自人工者。此卽造自最下級之人類。由是而形式積漸改良。至于有琢磨甚澤之石斧。銛利合度之鎗首。精好銳直之箭鏃。其智乃自然趨向于用金。最初必用紅銅者。因此金之顯見于礦苗。最足惹人注目之故。既具鎔金之智識。鍊柔金而使之堅。自易得有合金之法。于是遂由紅銅而青銅。殆智識足以用鐵。而文字亦以創作。遂入于歷史之界域。

然器物雖足以爲勁證。而終不若遺骸之尤要。且史前人類學家所得上古之遺骸。縱不盡備。亦已甚富。大足以隨器物之差等。而同證其秩序。舊石器時代之上半期。遺骸合頭蓋牙床而數之。約得十具。皆可證爲最下級之人類。惟從爪哇所得之人骨。今皆論爲其時尤古。其級尤下。下半舊石器時代之遺骸。雖所得頗少。然適有一級度增擴之頭蓋。亦與當時器物之稍良。適相應符。卽見進步之趨勢。

自將導入于新石器之世。新石器時代之地層遺骨自然豐多。合以上所指論。足依其頭蓋之級度。以分時期之早晚。而使人類進化之迹一覽而釐然。（舉例爲圖列于卷首）

石器金器等之各時代。以次相續。此乃言乎過去人類之大凡。若合全世界而統論。執一曲以精求。往往可數種時期同在一世。此因進化之力各有強弱。故甲種可已進于開明者。而乙種又可留滯于極古。所以在二十世紀之時代。世界尙有舊石器時代之人種。在三十年前。有如濠洲達斯曼尼亞島之野蠻。吾人且親見其滅種。彼等卽爲近世最下級之人類。研究野蠻。適可與研究史前之人類。得其平行線之差較。此與追論貴人寒微之家世。卽可取目前之傭販爲比例。正復相同。野蠻乃古世人種四散分配之際。彼等忽波流于絕域。與餘人不復相通。而思力偶又停蓄不進。遂無以展其腦量。故凡保持其石器時代狀態之野蠻。而其頭

蓋亦卽不改其下等之級度。

譯者按中國堯舜之世。三苗與華人尙立同等之地位。今則華人衣冠文物。縱或貽誚半化。然已不失爲初等之開明。苗之居于湘黔間山中者。依然操石器而食人。進化之與不進化。其文野可不眴而殊。其存滅亦可不察而卜。堯舜去今才四千年。若更四千年。而或進或不進。第二苗族。滯于半化。與世界彼此相較。其狀況有不堪形容者。嗚呼。滅種之事。雖非個人短壽。所能親見。然稍俛仰于古今。眞猶旦暮。烏可忽不加察也哉。烏可忽不加察也哉。

聚無量數之遺器。屬之于無量數之年載。若僅僅分之爲舊石器與新石器之兩時代。未免不適于分類。故若干分枝之名詞。因之以立。有甚多之石器。經有名之考據家所證定。皆當列于舊石器時代之先。因而一最古石器時代之名。增之于舊石器時代之上。比利時之專門名家黎圖氏。又分最古石器時代爲三級。曰羅

台林。曰冒佛林。曰美斯維甯。

舊石器時代。依英國學者之分類。枝爲兩大級。其第一級則爲前期。皆係水居之人。第二級爲後期。皆穴居之人。因前期人之遺器。皆得于古世湖河之砂礫中。故知其人皆露宿于淺水中央之沙渚。後期人之遺器。多得之于洞穴。遂知其人皆就石穴而居。然此種分類。殊嫌疎闊。且有人證明人類之始。卽居于洞穴。故近日舊石器時代之新支類。另分前期爲三小級。皆就法國之地名而命名。一曰曉林。二曰澳休林。三曰摩斯台林。黎圖氏復于曉林之前。添加一級。曰斯台屏。又有以曉林與澳休林合爲一級。或枝爲多級者。或復隸摩斯台林于後期。此皆各有其所據也。後期分爲兩小級。亦借名于法地。一曰索呂汀。二曰邁達勒甯。則據流行之分類。舊石器時代之兩期。共得五小級。與智識之深淺及當時氣候禽獸之變遷。皆配合分明。而後定。

舊石器與新石器兩時代之分別。至于近年。其別益著。然中間過渡之品物。所得亦不爲少。于是多數之著作家。于新舊兩時代之間。復附加中石器時代之一名。或稱之曰亞齊林。

新石器時代之命名。因出于此等時代之石器。皆琢磨甚精。此期亦分有支級若干。姑詳于他篇。今勿復以寡味之名詞。炫瞽學者于篇首。若上文蟲略之分別。必先說明者。因得此則時代之眉目。稍可預印一清晰之觀念于腦中也。並爲表如左。

最古石器時代 羅台林 冒佛林 美斯維甯

舊石器時代 (前期) 曉林 澳休林 摩斯台林 (後期) 索呂汀

邁達勒甯

中石器時代

新石器時代

金器時代 紅銅器 青銅器 鐵器

地質學家在始原石層以上。取地殼之可以石層分別者。區爲四期。由下層而上。溯自一至六。凡六大統名曰太古時期。爲無脊類魚類兩棲類等生物之時代。自七至九。凡三大統名曰中古時期。爲爬行類生物之時代。以上兩時期。非惟無人迹。并無人猿。第十統共分四小統。曰始新層。曰漸新層。曰中新層。曰最新層。則爲近古時期。從此鳥類與哺乳類。繼爬行類而代興。最上第十一統。分爲兩小統。曰冰紀層。曰現世層。總稱則曰近今時期。除最古石器時代別論外。其餘舊石器時代等等。皆限于近今時期之內。近今時期。或稱第四紀。近古時期。或稱第三紀。人類之起原。爲今人所確認者。則不出于第四紀。然若爪哇所得之猴人骨等。則又共爭爲第三紀之人。